



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Totzü jenjang atuba anema Cong-i state aika nung longkak ait

Sri Lanka tour atema Shikhar Dhawan captain shimogo



VOL. XVIII NO. 238 (ADOK 238)

DIMAPUR

KÜPTOKNÜ (SATURDAY)

AAMI (JUNE) 12, 2021

₹ 5.00

## Nagaland MLA aser MP ajak denür Parliamentary Committee ka tentetogo

**Kohima, June 11, 2021 (TYO):** Nagaland Legislative Assembly nung MLA 60 aser MP ana adenba Parliamentary Committee on Naga Political Issue ka tentetogo.

Parliamentary Committee nung Convenor ji Chief Minister Neiphu Rio aser Deputy Chief Minister Y Patton o Leader of Opposition TR Zeliang na Co-Convenor asütsü.

Maneni, Planning & Coordination, Land Revenue, Parliamentary Affairs Minister, Neiba Kronu-i Member Secretary inyaktsü shimogo.

Iba Parliamentary Committee nung Minister, Advisor, Member of Parliament aser Member of Legislative Assembly (MLA) ajak züngsemtsü, ta Hokolbarnü sorkari metetdaksü.

Parliamentary Committee-i Naga yimten tebilemstü dak sendakba onüktem atema jembitsü aser India sorkar o Naga yimten teloktem tsüingda yimjung olemtep nung tiyongtsü nung inyaker ka ama shilem agitsü.

Külen, Parliamentary

Committee nung züngsem 15 agi Core Committee ka tentetogo aser iba nung Nationalist Democratic Progressive Party (NDPP), Bharatiya Janata Party (BJP), Naga People's Front (NPF) aser independent MLA tem dena lir. NDPP züngsemtem: Agriculture & Cooperation Minister G. Kaito Aye, Rural Development Minister Metsubo Jamir, MLA H. Chuba Chang aser IPR, SCERT, VG Advisor Toshi Wungtung.

BJP züngsemtem: TPT, Land Resources Development Minister P. Paiwang Konyak, PHE Minister Jacob Zhimomi, IT, Science & Technology, NRE Advisor Mmhonlumo Kikon, TA, NH Advisor Dr. Longrineken aser Prisons & PS Advisor H. Haying.

NPF züngsemtem: MLA Imkong L. Imchen, MLA Yitachu, MLA Y. M. Yollow Konyak, aser MLA Dr. Chotisuh Sazo.

Independent züngsemtem: MLA Dr. Chumben Murry, aser Housing & Mechanical Minister Tongpang Ozukum.

## COVID-19 Nagaland: Ango 6 buba taneptsü angur timba

**Kohima, June 11, 2021 (TYO):** Nagaland nung anogo trok atongtepa COVID-19 puteter dang nungibo taneptsü angur timba liasü.

Hokolbarnü nisung 209 taneptsü angur aser 116 dak puteta nisung ajak agi 23,466 kümogo.

"Tanü nisung 116 dak COVID-19 aliba putet. Parnokji Tuensang nung 34, Kohima nung 26, Dimapur nung 19, Mokokchung nung 15, Phek nung 10, Zunheboto nung 5, Longleng nung 3, Mon nung 2 aser Wokha o Peren nung kaka (1) lir" ta

Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni tanü COVID-19 puteter nisung 209 taneptsü angur. Parnokji Dimapur nung 135, Tuensang nung 29, Mon nung 19, Phek nung 11, Wokha nung 5, Kohima o Zunheboto nung pezüzü (4) aser Kiphire o Longleng nung kaka (1) lir" ta pai metetdaksü.

Parnok züngsema taneptsü angur ajak agi nisung 18,587 kümogo. Nagaland nung COVID-19 nungi taneptsü angur

79.2% lir, ta Dr Kikon-i ashi.

Tang nisung 3,777 anepaludar aser positive rate 16% aluogo, ta paisa ashi.

"Hokolbarnü COVID-19 puteta alir nisung 4 asü. Parnokji Kohima nung 2 aser Dimapur o Mokokchung nung kaka (1) liasü. Tanü asürtem züngsema nisung 445 süogo saka nisung 14 bo tanga tashidak ajanga asü" ta Dr Kikon-i metetdaksü.

Nagaland nung COVID-19 puteter nisung 657 tashi tanga state temi ogo.

(Maneni tapak 10 nung...)

## Dimapur aser Kohima nung lockdown inyakyim metetdaksür

**Dimapur, June 11, 2021 (TYO):** Dimapur Deputy Commissioner, Rajesh Soundararajan, IAS-i Hokolbarnü Dimapur nung June 18, 2021 tashi lockdown inyakyimtem metetdaksüogo.

Aibelenertem Disaster Management Act 2005 aser Indian Penal Code (IPC) kübok merenshitsü, ta DC Rajesh Soundararajan-i ashi.

### Inyakyimtem:

Dimapur district nung 'No Mask-No Movement' aser 'No Mask-No Entry' akangkanga benschitsü.

Hombar, Mongulbar, Brihostibar aser Hokolbar

anepdang 6:00 ako nungi anüngdang 12:00 ako tashi hardware, agricultural tools/equipment/materials, stationeries, mobile phones & computer accessories, tire repair, vehicles spare parts dokantem aser gari yangluba garage lapoktsü melar. Iba atema DMC Administrator-i teinyaktsütem inyaktsü.

Teti agia aruba tekülem sentep sentong aser catering memelar. Ajisüaka, tamangba yimsü dak sendakba tesemtem nung COVID-19 inyakyimsülen anidakba nisung 20 tashi sarasadem sentong aser fellowship agitsü melar.

Rongdak aser tang

nüngdaktem inyaktsü ateam school/college tem indang office tem lapoktsü melar saka iba ya ketdangsür/staff teshimtet telok ka atema dang asütsü.

Maneni District Task Force Dimapur nungi jelia temelaba meshiba sülen nija business office tem nung ketdangsür/staff teshimtet telok kati mapa inyaktsü melar.

DTF-i jungjunga tendangba sülen construction mapa tasen inyaktsü melatsü aser Revised SOP nung lateta aliba ama tangalen nungi aayangertem anir arutsü akok.

(Maneni tapak 10 nung...)

## COVID-19 agi shiranga asüba mang amshiyim metetdaksür

**Dimapur, June 11, 2021 (TYO):** COVID-19 agi shiranga asüba tasü mang timi anepalura virus menatsü lenmang mali saka kulitem memeteti aser aibelenang atetba ajanga tasü mang amshitsü tsübuteper aser tasür kibong senzüka yutsür.

Iba khuret agientsü atema Nagaland nung COVID-19 agi shiranga asürtem mang anepalutsü atema inyakyim latetsüogo, ta Health & Family Welfare Department-i tanü metetdaksü.

### MOZÜ KIDANG TASÜMANG ANEPALUYIM:

# Mozü kidang tasü mang amshir ajaki Infection Prevention and Control (IPC) sülen anidaktsü aser PPE shitak agitsü.

# Tasü mang nungi tubes, drains, catheters amala ajak agizüiktsü aser biomedical waste disposal inyakyim ama IV cannula amala timi endoktsüla aser mang nung zübo alibatam disinfectant ajanga jungjunga

nembangtsüla.

# Mozü kidang tasür kinungertemi mang reprangnura isolation room nungi anittdang COVID-19 SOPs sülen anidaka reprangtsü akok saka mang nung mekongshitsü. Maneni tasür kinungertemi mang anepaluba healthcare nisungtem dak-a mekongshitsüla.

# COVID-19 agi asürtem leak-proof plastic body bag mesüra leak-proof plastic sheet agi alepbangtsü aser temalen 1% sodium hypochlorite solution agi merüktetsü. Iba sülen süngden nung enoker shibangba sülen 1% sodium hypochlorite solution agi süngden merükteter ghonda tesadang ka ayutsü.

# Iba sülen tasü mangji kinunger mesüra Village Disaster Management Authority (VDMA) ket nung mesüra District Task Force-i inyakyim latetba ama leper/crematorium-i bener aotsü.

# Health ketdangsürtemi mang renemer agütsüba sülenbo

tasü mang süngden benschir dak virus menatsü lendong kecha mali. Ajisüaka süngden benschirtemi glove aser mask enoktsüla aser mang endokba sülen teka jungjunga metsüksüla.

# COVID-19 agi asürtem mang abentsü atema gari kecha balaka mali saka koba gari nung bender, mang endokba sülen 1% sodium hypochlorite solution mesüra formulated bleaching powder agi gari merüktetsüla. Ajisüaka, mang abenba gari nung nisung aika mamentsü.

# COVID-19 agi shiranga asürtem mang tanga tasürtem den kasa aser kinungertemi aginüba ama aremstü/rongdoktsü akok.

# Tasü mang süngden jungjunga shibangtsüla aser sorkari lateta aliba ama asüpila sentong aser leper nung nisung 20 dak tema adenshitsü memelar.

# Asüpila sentep sentong nung kima nung mesüra tesem tesadem nung agitsüla aser nisung o nisung tsüingda tepila

ayutsüla. Tasü mang süngden benschirtem mesüra mang arondak ketdangsürtemi glove aser mask enoktsüla aser 'full PPE' agitsü nüngdak madoker.

# Mang aremba mesüra rongdokba sülen virus menatsü lendong kecha mali.

### KIDANGTASÜMANG ANEPALUYIM:

# Mozü kidang masü saka kidang COVID-19 agi shiranga asürtemia temalen agüja aliba inyakyim benschitsüla aser taintem mesüra temang nung tashidak alirtemi tasü mang anepalu masütsüla.

# Mang amshir ajaki glove asemstüla aser mang nungi tzü alura mask den külemi face shield mesüra goggles enoktsüla. Mang amshidang fluid resistant gown asemstü mesüra mang amshiba sülen süoshi ajak jungjunga shidoktsüla.

# Mang enoktsü asoshi body bag melira plastic mesüra sü agi mang longbangtsü akok aser

mang amshir dak alaka tangar nem mang nung mekongshidaksütsüla.

### TASÜRASER KINUNGER MESENMETUA MAMSHITSÜLA:

# Village/ward ketdangsürtemi COVID-19 agi shiranger asür mang endokba nung tenokdangba talila magütsütsü.

# Tasür kibong, kinunger aser medemertem inyakyim lateta aliba benschia asüpila sentep sentong nung adentsü melatsüla.

# COVID-19 agi shiranga asürtem loktii mesenmetua mamshitsüla aser kinungertem balaka bendanga mamshitsüla. Tasür nem akhüm agütsütsüla aser kinungertemi asür nem tetushi agütsütsü atema melatsüla.

Item tetuyuba alema inyakba telok/kija Nagaland Epidemic Disease (COVID-19) Regulations 2020, National Disaster Management Act 2005 mesüra tanga ozüng tapet agi merenshitsü.

## Covid-19 tashidak nokdangtsü atema senso shia teinyaktsü asem :

Tangar alidak teti teni tebang nembang mask temerük agiang;



Tangar den tsüktepa tenokdak aser temen;



Teti sapon agi teka metsükang.



Tir Yimiyim

# Dimapur nung Ao arogo aser lokti tentet-temi Covid tongpang nung shilem agir



**Dimapur, June 11, 2021 (TYO):** Dimapur nung Covid-19 tashidak wara anema raraba tongpang nung wajak purtem nungita yariba tamaisü sayua Hokolbar nüa Dimapur Area Ao Baptist Churches & Ao Civil Societies Co-Ordination Committee on Covid-19 purtemi Covid Hospitals, Covid Care Centers aser CMO office, Dimapur nung inyakertem ajak nem chiyongtsü agütsüogo. Parnoki May 29, 2021 anogo

nungi tenzüka tanü agi pezübenbuba medical front line worker-tem nem chiyongtsü agütsür asütsü. Yashi Bresthibar nüa parnoki non medical front line worker-tem DMC Sanitation workers (yimti yimdong aokertem), Electrical department nung officers aser Field staff-tem, police personnels aser jail nung inyakertem semdanga sarasadem mapang agiogo. Iba

mapang parnoki parnok nem refreshment agüja liasü. Tang ama tetsübuttsü tashidak wara den raradang nübortem meima pei mapa nung bendanga agüja inyakba asoshi frontline worker-tem ajak dang Dimapur nung aliba Ao Baptist Arogotem aser Aotsür Aor loktitentet telongjemi pelaba metetdaksüogo. Parnokisa iba tashidak wara tongpang nung maneni nüngdakba purtem den yaritepa aotsü bilemdagi.

# Kohima nung nija garitem atema Odd-Even system benoker

**Dimapur, Aami/June 11 (TYO):** Deobar dak alaka tanüngba anogotem nung Kohima Municipal Council kübok nija garitem 'Odd-Even' yimya nung jasadaktsütsü melatsü, ta Deputy Commissioner aser Chairman DTF Kohima, Gregory Thejawelie NCS ajanga

sangdong ka nung number tembanga aliba garitem jasadaktsütsü. Hombar, Bodhbar aser Hokulbar anogotem nung Odd number (1, 3, 7, 9) agi gari number tembanga aliba garitem jasadaktsütsü. Mongulbar, Bresthibar aser Honibar anogotem nung Even number (2, 4, 6, 8, 0) agi gari

number tembanga aliba garitem jasadaktsütsü, ta sangdong ajanga ashi. Iba totuyuba nung aibelener nem Motor Vehicle Act 1988 indang Section 177 & 179 kübok merenshitsü aser iba totuyuba ya tang nungi tenzüka June 18, 2021 tashi amshitsü, ta sangdong ajangasa metetdaksü.

# Kohima aser Wokha nung Pneumococcal Conjugate mozü sayaogo

**Dimapur, Aami/June 11 (TYO):** Primary Health Centre, Kohima Village nung June 11, 2021 nü Pneumococcal conjugate mozü sayaba sentong ka agia liasü.

adokdaksüba Pneumococcal ajanga lir, ta State Immunization Officer, Dr. Ritu Thur-ia iba sentong nung ashi. Pai sentong nung adenertem dang pei tanurtem PCV doses asem ya arishi küm telemsa 1.5, 3.5 aser ita 9 nung agidaktsütsü ayongzüka liasü. Mozü aika agiba nung timtem mali ta kuli ngutetogo aser kasa mapang ajem agiba ya tanurtem asoshi tajung lir, ta pai ashi.

Iba mozü dose mezüngbuba ya hopta trok (ita 1.5) nung agütsütsü, tanabuba dose ya hopta 14 (ita 3.5) aser tasembuba dose ya booster ama ita 9 nung agütsütsü, ta pai ashi. District nung küm shia tanur 1,249 nem iba mozü ya agütsütsü nükjidong lir, aser intensive immunization atema mozü ya healthcare center ajunga nem lemtsüogo, ta pai metetdaksü.

Sentong nung Principal Director, Health & Family Welfare, Dr. Neikhrielie Khimiao-i ashiba agi, Government of India indang Universal Immunization Programme nung iba mozü ya bendenlokogo, koba agi tanurtem dak Pneumococcus ta ajaba Bacterium ajanga adokdaksüba Pneumonia aser Meningitis nungi kumzüksü. PCV ya danga mozü ama mozü tajung lir aser iba mozü ya District Hospitals, UHCs aser PHCs ajunga nung angutsü. Linük tesem ajunga nung iba mozü ya routine immunization kübok angati agütsür.

Dr. Motsuo Memorial District Hospital, Wokha nunga Pneumococcal conjugate vaccine sayaba sentong ka June 11, 2021 nü agia liasü. Sentong nung okila o jembiba mapang Chief Medical Officer, Wokha, Dr. C.W. Tungoe-i ashiba agi, pneumococcal, pneumonia aser meningitis tashidak nungi tanurtem kumzüka ayutsü mechi mozü tasenba ya Government of India ajanga universal immunization programme nung inok.

Iba sentong nung mendenpuba, Dy. CMO, Wokha, Dr. Zuben Kikon-i ashiba agi, iba ama tashidak agi linük nung tanur jenti süogo aser tanurtem dak tashidak mela mela atonger asünung, tangu sashiba nung timtem aliba tanurtem kumzüksü atema iba mozü ya benok. Paisa iba mozü ajunga agiba ajanga tanurtem tashidak tamajung nungi kumzüksü, ta ashi. Iba mozü sayaba sentong temer tanurtem nem mozü ya agüja liasü.

Tanur arishi küm pongu telübok nung alirtem asüba ya timba bacterial pneumonia ajaga

# Meren Emkong ken YouTube nung angatetsü



1987 küm Lt. Meren Emkong arishi küm 35 asüdag menüngokba Sayutsüngi o den pai atenba ken YouTube channel nung enokja lir, anungji tanganertemi- Meren Emkong Missionary-ta asüba tenüng bushia lapoker angatetsü. Pai sayutsüngiba o aser ken nisung aikati anganüa asangdangba agi itemji mashi mapang ka nung mobile phone nungia angatetsüsa enoktsüogo. Tsüngremi iba sayutsüngi o aser ken angar ajak moajangma.

# Tuensang nung lockdown atsülangba asadanga liasü

**Dimapur, Aami/June 11 (TYO):** Tuensang District Task Force for COVID-19 pur senden ka Deputy Commissioner indang Conference Hall nung June 11, 2021 nü mena liasü. Iba sentong nung Deputy Commissioner aser Chairman, DTF Tuensang, Kumar Ramnikant menden liasü. Senden nung züngsemtemi district atema lockdown SOP tem tanaben reprangshia liasü. Senden nung züngsemtemi lockdown ajanga ita ka shibangba dokan indang ki kiburdang ki para (rent) ajemtsü atema ayongzüksü lemtet aser Tuensang Town Council-ia TTC meyong dokan tem nung para ajemtsü molunga liasü.

jenbua alitsü atema ozüng balala benokba nung aibelener dang senchi achiba nungi bendenba sen amshia DTF Tuensang ajanga pulse oximeters aser thermometers atema bank account lapoktsü lemteta liasü. Iba account nungi timtem nung aliba shirangertem yaritsü aser iba account ya tetenlar atema lapoka alitsü, ta senden nung lemtet.

Local taxi tem Odd aser Even yimya nung jasadaktsütsü lemtet saka driver tem ajak COVID tendangtsüla aser iba tendangtsü anogo lemteta liasü. COVID-19 tashidak nungi

June 13, 2021 nü Tuensang Town ajunga aser Yali village nung alirtem ajak nem COVID-19 mozü agütsüba sentong ayongzüksü lemteta liasü.

Government Polytechnic, Sedem nung aliba Tuensang COVID Care Center ya June 11, 2021 nü activate süa liasü aser iba CCC ajanga district nung COVID-19 tashidak agi meneper temang nung timtem magütsürtem aser home isolation atema facility peria malirtem anepalutsü lemteta liasü.

# CHC Medziphema indang OPD Assam Rifle Camp-i belener



Medziphema Town, Ward-9 nung 41 Assam Rifles indang Unit Hospital semdangba sülen Medziphema Town Mechü Krotho lenirtem aser mozüki ketdangsurtem külemi tangokba noksa ka yangi angur.

**Dimapur, Aami/June 11 (TYO):** CHC Medziphema nung aliba OPD service ya tang nungi tenzüka 41 Assam Rifles Camp, Ward-9, Medziphema Town nung benokogo, ta sangdong ka ajanga ashi. Sub-division atema CHC Medziphema ya Covid Care Centre dangi melenba mechi iba mera ya agi, aser iba atema nüburtemi state sorkar aser Assam Rifles tem dang kanga pelaba lemsatepa liasü. Assam Rifles dangi tepela shidi ka züluba nung, Assam Rifles temi tensa tajungba makum tashi parnok indang unit

hospital nung akok tashi OPD service ajak agütsütsü molungtetba atema pelar, ta Medziphema Town Mechü Krotho (MTMK) ajanga ashi. Assam Rifles temi iba ama mapa tajung inyakba ya nüburtem molungjang nung teti alitsü, ta shidi ajangasa ashi. MTKM ketdangsurtemi Assam Rifles unit hospital ya semdang aser parnok dang tarutsü nunga iba ama mapa tajung maneni inyaksü ajungshia liasü aser kasa mapang battalion nung alirtem nem tasütait molungsentü, tashi aser anema aliba takum moajang ta sarasademtsü.



Assam Chief Minister Himanta Biswa Sarma-i Indira Gandhi Stadium nung yipden 300 aliba COVID hospital lapoktsüdang agiba noksa angur. Iba mozü ki ya State sorkar aser DRDO ajanga lapok.

### Congress-i Kamakhya aser CM Himanta'er kümzüksü nangzüker

Guwahati, June 11, 2021

(Agencies): Assam chief minister Himanta Biswa Sarma-i state nung nütsüng yongsük kanga aika akümtsü ta jembiba atema Congress-i pa aitsüogo.

"Mapang ka nung ozüing alema arurtemi Kamakhya temple grounds nung menbangtsü aser ozü ki nisung masemtsü" ta Sarma-i ashi.

"Ozüing alema arurtem ta asübaji Citizenship Act mapa tenzükba sülen tangalen nungi arutsüpurtem asütsü" ta Congress spokesperson Bobbeeta Sharma-i Sarma

lutsü. "Akhümtsübu aliba CM-i tarutsü nung nütsüng yongsük aika akümtsü ta ashibaji CAA ajanga Bangladesh aser Pakistan nungi nisungtem aruba ajanga ajurutsü. Congress party-i akhümtsübu aliba CM dang Kamakhya aser pa ki kümzükba ayutsü atema teinyaktsü mapatem inyaktsü nangzüker" ta Bobbeeta Sharma-isa metetdaksü.

"Nütsüng yongsük yamaisa timba küma ora, künu anogo Kamakhya temple ali aser ozü ki atsünga agitsü" ta yashi CM

Sarma-i shia liasü. Chief minister kati state ka indang litsü kanga junga meteta alitsüba sernung yamai jembiba ya CM memesük. Pai nütsüng yongsük aika akümer ta ashibaji kuli tejangja nung ajemdaker masü, ta Congress-i pa o meyiptsü.

"India kübok state aika nung tesüiba küm 5 tsüingda total fertility rate (TFR) ajema kümogo ta Union Ministry of Health and Family Welfare-i National Family Health Survey (NFHS) agiba nung metetdaksüogo" ta parnokisa metetdaksü.

### Itanagar nung lockdown lia BJP office tasen lapokba aitsür

Itanagar, June 11, 2021

(Agencies): Hokolbarnü Union Minister Kiren Rijiju-i Itanagar nung Bharatiya Janata Party's (BJP) indang office ki tasen lapoktsüogo.

Itanagar nung Rs. 17 crore endoka yangluba BJP office lapokba sentong agiba atema nübortemi ashishiteper, kechiyong Itanagar nung nisung lokti adenshitsu memelar aser nikongdang 3:00 ako sülen nungibo lenmang nunga mesenzüdaksür.

Itanagar nung partial lockdown aliba mapang aser nisung telok adenshiba noktanga mapang ka nung BJP office lapokba sentong nung

nisung noklang aika adenshi. Covid-19 kanga putetba agi tangalen nungi state-i nisungtem arutsü memelar saka iba sentong nung central BJP lennirtema aika arua aden. Ajisüaka, BJP president J P Nadda-ibo online ajanga dang shilem agi.

Iba sentong agiba ajanga Vivek Vihar aser Chandranagar nung traffic timtem adok aser NH 415 külen tsütsü shibangba ajanga nübortem timtem.


Tanü social media nung nisungtemi Chief minister Pema Khandu, deputy chief minister Chowna Mein aser union minister Kiren Rijiju nung dena BJP lennir aika dena agiba

sentong aitsüogo. Arunachal Pradesh CM Pema Khandu-i SOPs sülen anidakogo aser BJP indang office ki tulu nung züngsem shia pei pei indang chamber lir ta ashi.

Taoba mapang Itanagar nung BJP office ki yanglutsü atema lung azüing saka February 2019 nung PRC lendong atalokdang police-i lanur ana kasetba sülen Itanagar nung alirtemi tejashi nung BJP-i lung azüingba tesem nung tasüming anaji rema liasü.

Iba sülen Arunachal nung BJP lennirtemi BJP head office asütsü atema engineer ka indang tasen ka alizüka liasü aser ibaji tanü lapok.

**Piles Cure Centre** - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. Time: 7 AM - 3 PM - Yours sincerely -Luntsuba, Add: Tuensang town



**DEBTS RECOVERY TRIBUNAL, GUWAHATI**  
Government of India, Ministry of Finance  
Department of Financial Services (Banking Division)  
Suvarna Bhawan, House No.12, New Town Path,  
G.S. Road, Ulubari, Guwahati- 781007

**NOTICE OF DEMAND TO THE CERTIFICATE DEBTOR(S)**  
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

R.C. No. 3477 dated 04-07-2019  
Bank of Baroda, Dimapur Branch  
-Vs-  
M/s. M C Donald's (Restaurant) & Ors.

To,  
1. M/s. M C Donald's (Restaurant), Proprietor Mrs. Lilly Yephthomi, W/o Mr. Bernard Angami, R/o Village:- Lhomithi, Circular Road, Near Papular Bakery, Dimapur, Nagaland, P.O. & P.S.- Dimapur, PIN- 797112.  
2. Mr. Bernard Angami, S/o Late K.S. Angami, C/o M/s. M C Donald's, Circular Road, Dimapur, Nagaland, P.O. & P.S.- Dimapur, PIN- 797112.  
3. Shri Kiyetho Yephthomi, S/o Ma L. Akuto Yephthomi, R/o Lhumitho Village (Single Basti), Dimapur, P.O. & P.S.- Dimapur, PIN- 797112.

This is to certify that a sum of Rs. 23,71,196.00 (Rupees Twenty Three Lakhs Seventy One Thousand One Hundred Ninety Six only) as per details given below has become due from you consequent to a Recovery Certificate issued by the Ld. Presiding Officer by an order dated 10-05-2019 in Case No. O.A. 467/2018.

(1) Amount due as per the Recovery Certificate:	Rs. 20,15,356.00
(2) Interest from 01.09.2018 to 01.11.2019 @ 12.5% P.A.	Rs. 3,32,840.00
(3) Costs	Rs. 23,000.00
<b>TOTAL</b>	<b>Rs. 23,71,196.00</b>

2. You are hereby directed to pay the above sum within 15 days from the publication of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for  
(a) such interest as is payable in accordance with the recovery certificate (R.C. No. 3477 / 2019) for the period commencing immediately after issue of recovery certificate to the date of realization, and  
(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 5TH DAY OF APRIL, 2021.  
(S. KUMAR)  
RECOVERY OFFICER I

### JNIMS staff nurse dak tim masüba mapa inyakba atema doctor ka anentsü

Imphal, June 11, 2021

(Agencies): Imphal nung aliba Jawaharlal Nehru Institute of Medical Sciences (JNIMS) nung medical officer-i staff ka dak tim masüba inyakba atema Manipur sorkari ketdangsür mapa nungi anentsüogo.

Bodbarnü COVID-19 ward nung Medical officer Dr Pangambam Bohnson Singh-i staff nurse Lhingneivah Haokip dak tim mesüi kongshi ta tai tonglokja lir aser ibaji CCTV nung lir.

Iba tatalokba sülen social media nung video prokshiba ajanga JNIMS ketdangpurtemi bushisüingdang asütsü tenzük. Brihostibarnü JNIMS director Prof Th Bhimo Singh-i bushisüingdang asütsü tetuyuba agütsü.

JNIMS nung Dr Pangambam Bohnson Singh anema ken o bushisüingdangba tembangogo aser iba jagi pa suspension kübok ayur, ta Health & Family Welfare department principal secretary, V Vumlungmang-i ashi.

### June 15 nungi Assam nung Covid-19 talenba salatsü

Guwahati, June 11, 2021

(Agencies): Assam sorkari June 15, 2021 nungi Covid-19 tenokdangba kar salatsü ta chief minister Himanta Biswa Sarma-i metetdaksü.

Guwahati nung aliba Sarusajai Sports Complex nung yipden 300 aliba Covid Care hospital lapoktsüdang CM Sarma-i iba osang ashi.

"June 15 nungi onoki talenba kar salatsütsü. Ibaji district-wise positivity jenjang reprangdang scientific pattern nung asütsü" ta pai ashi.

"Covid-19 tensa tajungba akümba district tem nungi talenba salatsütsü. Onoki khen nung dang

tenokdangbatem magientettsü kechiyong meimchir takümtem kümzüksüla" ta Sarma-isa shisem.

Assam sorkari May 12 nü office, tamangba yimsü tesemtem aser weekly markets ajak anogo 15 nü shibangtsü tenokdangba agütsü. Iba ya masüingdang nikongdang 2:00 ako nungi anepdang 5:00 ako tashi nisung senzüba noktanga liasü.

May 4 nü state sorkari night curfew aonung 6:00 ako nungi aliba aonung 8:00 nungi tenzüksü mapang melenshia liasü.

Assam nung tang dokan aser shishilembadak ajak anepdang 11:00 ako nung shibanger.

### Assam police-i gari auyar 3 apu

Guwahati, June 11, 2021

(Agencies): Assam aser Meghalaya nung gari auyar nisung 3 Assam police-i puogo.

Dudhnoi police station nung ken o ka benoka aliba nung ajemdaker Brihostibar aonung Dy SP (HQ) Goalpara aser SI Sumit Talukder nati anir Assam Police telok kati West Garo Hills, Meghalaya kübok Rajabala aser Phulbari tesemtem mita ao.

Iba mapang auerem ket nungi motorcycle aser Bolero pick-up

gari ka ngutet. Iba auer telok tanishirji Noor Alam lir aser pai Assam nungi auyaba garitem alizük.

Ano, Rashidur Mandal ta ser nisung kati Noor Alam den yariteper aser pai Bolero pickup gariji alizüka liasü.

Noor Alam aser par telok nungi auyaba motorcycle ka alizükba atema police-isa Rahmat Miya apu. Parnok ajak ya Meghalaya kübok West Garo Hills district nung alirtem lir.



Hokolbarnü Agartala railway station nung Tripura Chief Minister Biplab Kumar Deb den minister tem, MP aser MLA temi jiru tonne 11 abenba Kisan Rail tenzüksüdang agiba noksa angur. (Agartala, June 11)



## TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI (JUNE) 12, 2021

### Yaritepa alitsüba purtem

**A**lima nung tang ama tashidak wara tamajung aser lendongtsüdong alidang dang masü saka mapang tajung nunga nisungtem rongnung yaritepa alitsüba kanga nungdaker. Asenoki asenok alima nung aliba nükjidong indang ya jungjunga bilemdangra, kati ka yaritepa alitsüba dak alaka tanga mapa tuluka inyaksübo mali. Iba jagiang nisungbo, shiruru ama masü, yim kümteta külemi alir. Aji oda, yaritepsüba mapa ya tapu ana lir, kaji aseni tangar yaritsü aser tangabaji tangari asen yaritsü. Atangji, asen taküm ya asensasa yangluba masü, teyanglur kibur ka lir, anungji asen taküm tia aser liayonga aotsüba jenjangji Pa ket nung dang lir, Pa mulung. Ajisüaka, Pai asenok temang anema toktsü tashibo asen temang nung asen kibur asütsüsa teyangluri asenok nem tashi aser temeten agüja lir, anungji asenoki koma linür ajibo asen mulung, anungji asenoki akokba tashi tangar yaria linüra asen mulung aser yamaji mesüi tangar nungiang asenok teyari meshia linüra, ajia asenok mulung. Asenok anema ali tashibo asenoki tangar yaritsü süli mesüra tangar nem yaridaksütsü süli, aji atema shinga danga temelaba meshitsü menügdaker, aji asen mulung, aseni dang lemtetsü. Iba libaliro yariji dang Tsüngremia asenok anitsü. Atangji, nisung karbo kanga kümdanga aliyonga anema malir aser karbo mashimashi aliyonga anema alir, item ajakji Tsüngremer sentong asütsü, ajisüaka asenok anema ali tashibo asenoki tangar yaritsü asü, tangar nemang asen yaridaksütsü (?) ta asüba yaritepsüla tapu ana rongnungji asenoki shimtetsü. Nisung karbo temang anema lir aser pei taküm nungdaka ajak peria kar, saka tangar dang dang teyari meshia alir, saka ano karibo peiang magi aser peiang machi tangar nem agütsür. Kodang asenoki nisung tapu ana taküm aser kibongji medemdanga reprangdir, shianga nema kecha magütsü aser shinga meyaridangba nisung aser kibongji lia liabo ajak tangar dang meshitsüla aser tangar teyari nungdaksüsa taküm aser kibong tia nung tema angutsü. Ajisüaka, aka maka ta mali, teti tangar yaritsü mulunga aliba taküm aser kibongji pelatepa tsüraburtemang tajungba aser par chirnurtemang jangrattemba ta lia aoba angutsü. Aji oda, asenoki anogo shia Tsüngrem dang anema yujang ta taochi meshia sarasadem, aser yamaji anema toktsür. Ajisüaka, kodang asenoki asen sarasademba nükjidong indangji süoki ia, Tsüngrem dang kechi inyaksüba atema anema tokjang ta mepishir ta bilemdangdir, idangji asenoki asen taküm nükjidong indang tajungba rajemtsü. Aji oda, asenok sarasadem tesüdak nung Tsüngremi asenok dang kechiba anema linür ta asüngdangka asünunga, asenoki koma langzüla ? Ni agitsü, ozü atema rongsen bendentsü, ozü chirnurtem anepalutsü, onok kinungertem jangratema alitsü asoshi ta ni, ozü aser onok agi sünger langzütsü asü mesüra tangar yaritsü aser tangar asoshi tajung tilakabosa inyaksü merangtsüba indang ashitsü ? Talisa, tang ama alima tashidak wara tesashi agi asenok amokmerendang, asenok ajaki Tsüngrem dang taochi aser tekümsükba meshia sarasadem. Asenok, kotaki aotsü purtemi dena, shingaia mesüner, aji alima meimchir yimya, anungji Tsüngrem dang arishi meshir. Ajisüaka, asenok dang Tsüngremi kechiba alima nung yamai linür (?) ta asüngdangka asünunga asenoki koma langzütsü ? Anosa ochimashi mapa inyaka alitsü, tangar indang ajak bendena ozü takar akümtsü merangtsü, tang amato mapa meinyaki angati anguba rongsen bendena takar akümtsü merangtsü aser ozüibo shinga nema kecha magütsütsü aser shinga meyaritsü saka akok tashi tangar nungi teyari agia ayongayonga alitsü merangtsü asoshi arishi meshir ta ashitsü asü ? Aji oda, asenoki mepishiba ama Tsüngremi asenok dang arishi agütsüdi, ka shimtetang, alima nung na tangar yaria linür asü (?) mesüra tangar nem na yaridakja linür (?) ta asüngdangka asünunga koba shimtetsü ? Asen mozü kidang amongtsü mesüra mesenzütet yipten nung zükdaka yur tangar nem yaridaksü tajungba asütsü asü (?), tangar mozü kidang aser pei kidang timtema alirtemang aseni yariba tajungba asütsü ? Ka mesüra kabosa asütsü, tanü ana rongnungji asen agitsü ka shimtetdi, Tsüngremi aji agütsütsü.

## OLEMSABANG

### Asen Tsüngremi langzütsü ?

~ S. Nuken Longkumer, Naga United, Dimapur.

**Q:** Naga nungger ajak telungjem lenjem ka bushitsüla ta nisung ajaki belemer. Saka Tsüngrem taochi mali tashi asenoki iba sendong matongtsü südi? Naga nungertem aiben lungjema jembidangogo! Naga nungger nuchiso bushidang taküm aika sama-ogo! Naga nungger China lima tashi tetsüng agi jajaba otzü asen mulungjang nung yua lir, saka tanü lanurtemi memetet, otzü meteteremi shiang parnoki angatetsü aser pei taso lima meimtsü!

**Ans:** Alima nung tanü meimchir inyaksangshi tesüngmangtsü aorasünung tenük tapok kümogo saka laishiba sarasadema azüngtsü merangang? Oztü zulu nunga mepong den rarar ama dang akümerji joko mejembinür saka maremteter pongmang ya tesüngmangtsü ka lir? tanü alima ajak nung khuret lir saka Naga nungger khuretji olura? Anungji Naga nungger missionarytem aser Rev., pastortem Nagalima yimtsüng ajak nungi jateper iba sendongji Kohima yimti nung asütsütim. Iba mapang chia ajemtsü ya Minister MLA parnok 60 lir khuret ka agütsütsüla, parnok den tongtepratepsü asoshi nupu kar shimteter bushitsüla, iba mungdang tulu asütsü atema nupu tajung kar jaoka menden asütsüla, anogo 3 asem tashi ali nung apuzüia sarasadem nung teyanglur Tsüngremi asen dang kechi ka langzüdir? Ken arok aroka shisadangang Nagalima liner tajungtem?? Jembir mangateter jembir meinyaker, jembir tamajungba dang akümer? Asen tsüraburtemi Naga lima khirstan state asütsü nangzüka dokogo! Missionary merijang 10,000 yoktsü Tsüngrem dang azüngashia dokogo?? Mangdang tamajung marudang?

Ano ni aser ozü kipong ama Naga nungger aika amang tia nung lir, alima talangi moaka ana nung aser tezü nung alirtem anitenang ta ashi ama taküm nung yipru mepong aika ajangshia jaja Tsüngrem temeim memetet liasü, iba tensa nung alidang kunü anogo Kohima yimti nung sayutsüngir Mrs. Alemla A/P Women Khari village ajanga Tsüngrem ola tulu angashi, la onükji na aser nür kipong ali takang daka yutsütsü amangtemelem agi nempanga toktsütsü ta jembiba angashi dang aonung kü yipden nung ajepba olaji tulu liasü? Tsüngremi nür kipong moatsütsü kü sarasadem. Ano tensa tamajung mapang ka nung alidang ni amangba Tsüngremi Retd. Commr. & Sect. R.D. Bendangkokba Mepongchuket shibai ozü kipong alar tia nungi nuchi kümdaksü iba ama mapa tajung koda amatsü! Anungji nü mapa tajung kodanga amajok masütsü, Tsüngremi nü taküm arishia moajang ta sarasadem nung teti belemtetsü

#### N.B.

Asen Naga nunggeri yimnung aginüra Kohima yimtiba Ground nung mungdang tulu ayongzüker amanga mepishira?? Chiaajemtsü nung yaritepsü asoshi Naga nungger tuuulur takar mali no!! shisadangang nür tsüraburi kechi inyak ?

### Tamang Jenjang

~ T. Lima Tzüwar, Ungma Impang, Artang Ward

Khrista nung temeim amangpapur tajungtem asenok ajaki kanga kümdanga ochishia asen Teyanglur Tsüngrem amanga aser sarasadema ali mesüra iba atakatem wara asenok kibongshia dangi arutsü kecha menua mali. Asenoki kanga merena aser ulua aliyonga Tsüngrem tsüngdangbo shingaia mejenbotsü. 18 April aonung pongmang nung Doctor ka arur yamai ashi, nenok Aotsür Aortemi anir Naga nungger ajak ya achiajem nung kanga mekümdanger iba yongji tar tashidak, tepin tashidak, temesen tashidak, tepokpok tashidak iba den tar tazüng tashidak agi tonger kibongshia tsürapurtemi anir kangshiteper, anungji kanga tang kümdanga alitsüla, nenok kibong nung rongsen jenti alitsüa akok saka kechi angu tanguba ajakbo machitsü merangtsüla aser asentsü terabo sena alinungang nenok anema alitsü ta ashi. Ano April 23 aonung pongmang nung tenyari yamai ashi, Tsüngremi atemzütsüba putu küm 200 süitemogo, tang yabo tatempang putu iba putu mapang tang temepu putu ta ajar. Taoba tejen putu mapang arishi küm 600 nungi küm 300-i alu, iba sülen 150 i alu iba sülen 120 tang shirnok 105 aser küm 100 mesüra 90 tema lir, parnokji tejenba putu mapang asortem lir ta ashir. Tang tatem putu lanurtemi Tsüngrem sentoker parnoki Tsüngrem memetet tsürapurtemi sayutsüngi magütsür pei chir sünütsü südakja litepdaksür. Tsüngrem O agi pei chir azüoktsü melena mashikushi O tang shia intedaksüba ajanga lanur aikati ya keti ya keno ya kinunger sosem dangsemer memeteti azüapong tenzük. Iba yongji alima ya raksar ta ashir. Temeim amangbapur tajungtem, iba atakatem wara yaki alima rangpen kinük kisang ajak len kibong shia semdangtar ta tenyari ashir asü nung asenok amangbapur mulungjang nunga kechi koma ka angateter. Tashi temetet agi sünger takar tang toktepa kati ka arishitepa liteper, tiyazü shinür jenti pokteter, pei pei bilemba olulu temeneni alima kinük ajaklen amokpanger, anungji kanga junga shisadangang ta ashir. Nisung arishi küm 600 nungi tenzükba tanü putu mapangbo arishi küm 40-50 tang alir.

Temeim amangbapur tajungtem iba atakatem wara yaki asen Khristan lima-a tanaben buba tenzükshir asünung aser anogoshia renlokjen renloka aor aser tangar ama kibongshia mesemdangtsü asoshi amangbapur ajaki ochishia pei mulungjang ajak agi sarasadema atati. Asen Naga lima asoshi tang masü alima ajak asoshi telok aser kija ajaki temang anüpalur aser ajem akitsür telok kwika lir parnok teka aser ajem meshitetjang ta sarasademtsüdi, kechiyong temeneni alima kinük ajak amokpanger alir aser temeneni mapa inyaker asünung amangbapur ajaki sarasademtsü merangti.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Algeria nung Tenla ki ka shibangtsü aser pastor jail nung puok

**Tizi-Ouzou (Algeria), June 11 (Agencies):** Algeria linük nung court kati Tenla ki ka shibangtsüba sülen hopta ka shi dang lirbo iba Arogo nungji pastor, Rachid Seighir kum ka tepuokdak ayutsü atema obendang agütsü.

Pastor indang bookstore nung aliba kaketterem ajanga Muslim nung tamang anokshitsür, ta court-i aija pa tepuokdak ayutsü obendang agütsü.

June 2 nü Oran province nung Tenla ki asem shibangtsü atema tetuyuba agüja liasü, aser item Tenla kitem rongnung Pastor Seighir'er Oratoire Arogo Tenla ki densema lir.

Amongnü (June 6) pastor aser pa indang bookstore nung salesman, Nouh Hamimi na kum ka tepuokdak ayutsü obendang agütsüba den külemi senchi dinar sen 200,000 achi.

Pastor Seighir-i, 2018 kum pa indang bookstore dak sendakba mangatettep ken o nung ajemdaker pa anema tang mang-ayanger, ta ashi.

Oran nung governor-i 2017 kum nunga pastor indang

bookstore shibangtsü tuyua liasü, ajisüaka 2018 kum April ita nung court kati bookstore shibangdaksübaaji tim masü, ta ashi saka ketdangsertemi iba bookstore ji maneni shibangdaksü.

Taküm May 16 aser May 30 nü iba ken o angadanga sülen tang tesüsa June 6 nü iba ken o nung obendang agüja liasü.

Algeria nung 2006 kum ketdangsertemi Muslim nung dak alaka tanga yimsü amangertem tekülem agiba dak sendakba oziung ka yanglua liasü, koba dang Law 03/06 ajar.

Iba oziung kübok Muslim nung tamang raksatsütsüsa ocet mesüra kaketterem yokra kum 2 nungi 5 tashi tepuokdak ayutsü aser senchi dinar sen million 1 tashi achitsü akok.

June 2 nü court-i Pastor Seighir'er Arogo Tenla ki den külemi El-Ayaid aser Ain-Turk na nunga Tenla ki ana shibangtsü tetuyuba agüja liasü.

Osangbener den jembidang pastor-i, "Iba obendang ya Oran nung wali-i onok anema takok anguba lir. Court-i Tenla ki asem shibangtsü tuyu," ta

metetdaksü.

Ain-Turk ya Oran yimti nungi kilometer 35 shi pilar lir aser El-Ayaid-a Oran nungi kilometer 35 shi pilar lir.

Pastor Seighir-i, "Iba ya Algeria nung Khristantem aser Arogotem anema inyakba mapa ka lir," ta metetdaksü.

2017 kum December 28 nü taoba mapang Oran Province nung governor, Mouloud Cherifi-ibo, Oratoire Arogoi oziung alema meinyak, ta metetdakja liasü.

Algeria nung nütsüng shilem 99 bo Muslim nung lir saka 2000 kum nungi tenzüka Algeria Muslim nung meyirjang aikati Islam yimsü toktsür Yisu Khrista agizükogo.

Tang Algeria nung Khristan nütsüng 50,000 shi lir ta sorkar ketdangsertemi metetdaksü, ajisüaka iba dang nungjagi anasü agi timba lir.

Alima nung Khristantem tamajungba reshikangshiba linük 50 rongnung Algeria linük ya jenjang 24buba nung lir (Christian support organization Open Doors' 2021 World Watch List).

## ANOGO ABEN TSÜNGREM DEN

### Arung aser Ajiang

*Aser parnoki pa dang ashi, Rabi... pai parnok dang ashi, Arung, aser nenoki angutsü. Anungji parnok aru aser Pa kechi nung ali angu aser panüji parnok Pa den ali. Yohan 1:38b-39*

Asenok ajak dangi Khristan aini aoba otsü dang mejembitsü mapang ka arutsü. Iba indang dang jembiba jagi meperir. Asenoki aotsü apusotsüla! Khristan taküm nung sendakba indang asenoki ghonda aika agia jembitsü akok, saka asenoki shidakba Khrista sülen anidaktsü mapusora mapang intoka Khristan taküm nung sendakba indang dang jembiba jagi kecha masütsü!

Putu aika, Messia arutsü shisadanga liasü aser Israel kin ajanga shin. Yihuda nung rongnung Messia mapa yimya indang jembiba dang nungi tanga onük tali mejembi alitsü. Andiriai Yohan Baptitsüba nungi Messia arutsü indang angashi. Tang aoksa Pa ngunüa aliba nisung den tejak o tejak na chitepa angu! Andriai asüngdangnüa aliba asüngdangtsü Pa mulung dangi aru. Andria den theological topic jembitsü melen Yisui meyipa aotsü tenzük. Andriai asüngdangbaji O kisüng agi melangzüsü, saka len jajaba ajanga.

Khristan yimsüji angatettsü asoshi renema yuja aliba ka masü. Ibai nübu ka sülen anidakba lir. Yisu den jajadang Andriai Yisui shiranger anebtsüba, Tsüngremer shisatsü sayuba aser Tsüngrem ain sayuba Andriai angu. Andriai Tsüngrem indang dang angazük masü shidakba nung Pai Pa metetta aküm! Lemjem nung na ne Kibur den noktaksü mapang arutsü. Tasüngdangba ajak kazü dang nungi, Yisui ne dang ashi, "Ne tsüngsem semokang, leman jagi atokang aser Kü sülen anidakang." Na anogo shia Yisu den jajadang, Yisui ne tasüngdangbatem langzüsü aser nai asüngdangtsü metetta aliba dang nungi timba nai angutsü.



### Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail : abamimpur7@yahoo.co.in

Website: www.abamimpur.org

☎ : 0369-2262202 (O)

### ABAM-i SARASADEMSTÜ AYONGER

*Kibubai ashir, Tang danga nenok temulung ajak agi nenoki lumiseta, aser jeba, aser mang yima, aser kü dangi meyipang (Yoel 2:12)*

Aor ajak dangi,

Tamasa Ao Baptist Arogo Mungdang (ABAM) ajanga Yisu tenüng nung temeim salem lemsateper.

Church & Mission, ABAM ajanga arogotem ajak nung ghonda 1,000 metangtangi sarasademtsü ayongba ama arogotem ajak nung temoatsü ngua agidagi aser ibai June ita nung tembangtsü. Lokti sentep magitetaka pastortemi anir tapet asalendong yanglua nüburtem Tsüngrem O agi metangtangi mesüa arudagi. Pelar.

Tsüngremer tejembiba angateta, ABAM ajanga Aor ajak **June 13, 2021 (Deobar), aonung 6:00 - 8:00 PM**, pei kidang mesüra na aliba tesem nung khukhua lumia sarasademtsü ayonger (Yoel 1:14). Ajak atemabo iba mapang tapet masütsü akok. Arogo mesüra kibong kar nungbo kesa mapang nung sarasadem sentongtem ayonga alitsü akok. Meratai renema akaba sentongtem agidang külem amangbapurtem den tanela nung lungjemtsü imlar. Chirnur bendanglen alirtem dangi tsüraburtemi iba osang yokdaksüner. Teinyaktsü mapatem aika liaka ghonda 2 yabo kibong nung alir ajak külemi sarasademdaksüner. Iba ya temoatsü mapang ta angateta item khuret asoshi sarasademdi.

**Tatok Meshidi** : Tsüngrem temeim ulura saka aseni Tsüngrem pelatsüsa meliteter. Tsüngrem O tenoka tenoka angateta mebenshir, anemsü shisatsü, ochiba senzüka toktsür miima mapa tamajung inyakba, kati ka külakoktsüba, nükmere aser tangar majung jembiba, Tsüngremer temoatsütem pongpa-a agiba, tenla agütsüba nung aibelenba, taküm yimya aser achi ajem nung mazüokba, kati ka dang temeim mesayutetba, pei juri ajangzüksü bilema inyakba, ano aika. Arungma, item taitem asoshi tatok meshidi aser Tsüngremi asen tai adoktsü (1 Yohan 1:9).

**Wara Tesashi nungi Kümzükang ta Mepidi** : Wara ajanga kija, kibong aser lokti ajak dangi takoksa bener arutsür, tali shisabuludaksür, tsübudaksür, tekolok raksadaksür, kaketshirtem pei nükjidong metongtetsü tsüremdaksür, kati ka dak temulung masüba tali adokdaksür, chiyungtsü agi anungdaksür, aika anojungi iba wara agi tepseter, aser kibong aika mangyim tia nung lir. Administrators, doctors, nurses, front line workers, arogo nung tenzükertem aser ajaki pei akokba tashi agi merangdang saka wara tesashi mekokteter. Timtem ulura kümogo. Tsüngremi iba wara samajang aser timtem nungi kümzükang ta ayimtendi (T. Ken 9:12)

**Asentenshi Poktetdakjang ta Mepidi** : Küm aika amanga arur saka ashiko asenoki Tsüngrem tanela agi asentenshidaksüba majangshii alitsü akok. Mapangbo tamajung saka Tsüngrem chirtem asoshi iba timtemba mapang temoatsü mapang ka sütetsü. Asen dak temulungjang temerük ka poktetdakjang aser shitakba asentenshi tanela ka asen dak poktetdakjang aser ochi tanela taküm aser kibong shia nung poktetdakjang ta sarasademdi (T. Ken 51:10).

**Tanela Temeshi Milak** : Asentenshiba milak Ao lima nung jangrudakjang ta sarasademdi. Mapang tamajung ya Aor asoshi pei tai temenen nangzüka Tsüngrem tali bushiba aser Aor lokti, arogo, kibong aser kija taküm shia nung Tanela Temeshi milak jangrudaktsütsüsa melenshia litetsü tashi meshidi. Tanü Aor asoshi nungdabaji Tanela Temeshi Milak jangrudaktsütsüba ya lir. Arung, ibai asoshi mepidi.

*Kibubai ni ajepa angashiogo, Kibubai ni mepishiba angaogo. Kibubai kü sarasadem langzüogo. (T. Ken 6: 8,9)*

*Tsüngremer mapa nung;*

(Rev. Dr. Mar Pongener)

Executive Secretary

Ao Baptist Arogo Mungdang, Impur.

## IRF Summit nung Nigeria nung Religious Freedom indang jembitsü

**Washington D.C., June 11, 2021 (Agencies):** Tesüiba Nigeria linük nung Boko Haram telok densema Islamic kiralongrar telok balalai Khristantem jenti tepseter, puer aor aser nisung merirjang aika jenshiogo.

July ita nung Washington D.C nung anogo asemnü International Religious Freedom Summit aliba mapang nung Middle East nung religious freedom dak sendakba onüktem jembitsü, tongtibangtsü Nigeria nung kiralongrar telok balalai nübur jenti tepsetba atema jembitsü.

IRF Summit nung talisa Nigeria nung religious freedom atema jembitsü.

2020 kum kija nunga Boko Haram aser Fulani kiralongrartemi civilian aser sorkar mapa inyaker 1,900 dak tema tepsetogo, talisa Khristan

nütsüng aika aliba Middle Belt Region nung rara manener, ta kum aika Nigeria linük nung International Christian Concern (ICC)-i metetdaksü.

ICC-i ashiba agi, 2020 kum asürtemji timbaka Boko Haram telok mesüra auer teloki masü saka Fulani teloki tepsetba lir.

Mohamadu Buhari-i linük nung kiralongrartem aser auertem nokdangtsü, ta nangzüka 2015 kum pa Tir aküm; pai nangzükba ama terabo takok ngua inyakogo, ajisüaka linük nung Khristantem tepsetba manener.

Taküm April ita nung US Commission on International Religious Freedom (USCIRF)-i US Department of State dang Nigeria ya Country of Particular Concern (CPC) nung züngoktsü

benoka liasü aser yaküm USCIRF report nunga Nigeria linük ya CP nung züngoktsü benoka liasü.


**OLONG PAITEP # 5841**

	1		2			3		4		5
6								7		
					8		9			
			10							
11										
				12						
13		14		15						16
17								18		

- |                              |       |                              |       |
|------------------------------|-------|------------------------------|-------|
| <b>TIPLÉN</b>                |       | <b>LANGTSÜNGLEN</b>          |       |
| 1. Inyaker ajangtetba        | - (3) | 1. Meshidak                  | - (3) |
| 3. Bangsemo adokdak          | - (5) | 2. Tanaben soshir            | - (7) |
| 6. Shitak mesüi inyak        | - (7) | 3. Iba anogo                 | - (4) |
| 7. Ya mimong nung angur      | - (3) | 4. Meshi                     | - (3) |
| 9. Reprangzük                | - (4) | 5. Yagi mi tsükloker         | - (9) |
| 10. Tasola                   | - (5) | 6. Shi tapu ka               | - (9) |
| 11. S _ _ _ _                | - (4) | 8. Yagi ayimer saka ozü masü | - (3) |
| 13. Yagi ajak ashioktsür     | - (3) | 9. Ajokba shiruru ka         | - (7) |
| 15. Ki aokba oset            | - (7) | 12. Inyaktet                 | - (4) |
| 17. Ak shi nung inokba tasen | - (5) | 14. _ _ _ hi                 | - (3) |
| 18. Ishika                   | - (3) | 16. Akümüli nungi pilar      | - (3) |

**OLONG PAITEP # 5840 TELANGZÜBA**

- |                                       |                                      |
|---------------------------------------|--------------------------------------|
| <b>TIPLÉN :</b>                       | <b>LANGTSÜNGLEN :</b>                |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen,  | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük.        | 12. Sempa, 13. Jahaz.                |




**TANÜBO NAI LANGZÜANG**

Q. YounTab Scheme ya \_\_\_\_\_ nung lapokja liasü.  
 A. Tamil Nadu                      B. Kerala  
 C. Karnataka                        D. Ladakh  
 \_\_\_\_\_ (Taruba adok nung onoki langzüsü)  
**YASHIADOK TELANGZÜBA:** Tumour Antigen

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Jusa**  
 (v) pi indang sentong aser mapa menentsüba ( spoil)  
 \* Telok nung nisung kati jusaba agi telemtetba shitak magitet.

**Juzü**  
 (v) ali nung temang agi jajaba (slither)  
 \* Per ka ali nung juzü aser yakata aremleni juzüka ao.



Tir Yimyim

**NAI-A YA METETTER MA?**

- NETFLIX SABANGAJANGASAYUTSÜ ALIBA MOVIEASER SERIES KAR: JUNE 2021'**
- |  |  |
|--|--|
| "Picture a Scientist" (2020)                           | "A Family" (2020)                                      |
| "The Devil Below" (2021)                               | "Elite" (Season 4)                                     |
| "Elite Short Stories: Guzman, Caye & Rebe" (Season 1)  | "Fatherhood" (2021)                                    |
| "Elite Short Stories: Nadia & Guzman" (Season 1)       | Jagame Thandhiram (2021)                               |
| "FTA" (1972)   | "Kambili: The Whole 30 Yards" (2020)                   |
| "Let's Eat" (Season 1)                                 | "So Not Worth It" (Season 1)                           |
| "Life of Crime" (2013)                                 | "The Rational Life" (Season 1)                         |
| "Power Rangers Dino Fury" (Season 1)                   | "The World's Most Amazing Vacation Rentals" (Season 1) |
| "Rhyme Time Town" (Season 2)                           | "Nevertheless" (Season 1)                              |
| "Rogue Warfare: Death of a Nation" (2020)              | "This is Pop" (Season 1)                               |
| "The American Bible Challenge" (Season 3)              | "Good on Paper" (2021)                                 |
| "Elite Short Stories: Omar, Ander & Alexis" (Season 1) | "Murder by the Coast" (2021)                           |
| "Penguin Town" (Season 1)                              | "The House of Flowers: The Movie" (2021)               |
| "Silver Skates" (2021)                                 | "Godzilla Singular Point" (Season 1)                   |
| "Ali & Ratu Ratu Queens" (2021)                        | "Sisters on Track" (2021)                              |
| "Aziza" (2019)   | "The Seventh Day" (2021)                               |
| "Black Summer" (Season 2)                              | "The A List" (Season 2)                                |
| "Elite Short Stories: Carla & Samuel" (Season 1)       | "The Ice Road" (2021)                                  |
| "Hospital Playlist" (Season 2)                         | "Wonder Boy"   |
| "Katla" (Season 1)                                     | "The Seven Deadly Sins: Dragon's Judgement" (Season 5) |
| "The Gift" (Season 3)                                  | "StarBeam" (Season 4)                                  |
|  | "America: The Motion Picture" (2021)                   |
|  | "Lying and Stealing" (2019)                            |
|  | "Sophie: A Murder in West Cork" (Season 1)             |

**SUDOKU # 5883                      TELANGZÜBA # 5882**

	9	8					7												
6							9			7	3	9	2	5	4	8	1	6	
4					3			5			1	4	8	3	6	9	2	5	7
1	5			2	8	7	9				2	8	5	7	4	1	6	3	9
	4		3	7		1	5	6			3	7	1	9	2	6	4	8	5
	3	9			5	4					9	6	4	5	8	3	7	2	1
											5	1	7	4	3	8	9	6	2
	6	7		8		5		4			8	9	6	1	7	2	5	4	3
					4	2	1	9			4	2	3	6	9	5	1	7	8

**OJANG LUTEP # 5427**

TBAEGN	:								
GIA	:								
SAAAR	:								
SHMEEITT	:								
ARNGMU	:								
DBENO	:								
AANKOMG	:								
OSÜT	:								
ENLEDKOMA	:								
JMMBIEE	:								

**OJANG LUTEP TELANGZÜBA # 5426**

ZÜYU OZÜ TZÜRABA SHIA ANÜNG NUNGI  
 TZÜNGLU JAZÜKA TZÜ AJEMER

**TAN HOPTA ATEMA - KOMA SÜLA ?**

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia-adok nunga koma süla ?

### Totzü jenjang atuba anema Cong-i state aika nung longkak ait



June 11, 2021 nü Hyderabad nung aliba petrol pump ka nung Youth Congress züngsemtemi petrol aser diesel jenjang atuba atema Centre sorkar anema longkak aitba mapang 'The Century Man PM Modi' ta zülua alidak mamatzü ainba noksa nung angur.

**New Delhi, Aami/June 11 (Agencies):** India nung petrol aser diesel totzü jenjang maneni atuba anema Hokolbarnü Congress party-i state aika nung longkak aita gari totzü jenjang ajemtsüla, ta sorkar nem takhangba agütsüogo.

Delhi, Tamil Nadu, Punjab, Karnataka, Haryana aser Uttar Pradesh densema state aika nung Congress nung inyakertemi petrol pumps nung adenshir longkak ait.

Delhi nung longkak aitba sentong nung jembidang Congress lenir, KC Venogopal-i, "Centre nung UPA sorkar aliba mapang nungbo petrol aser diesel nung saru sen 9.20 dang liasü. Tangbo saru sen 32 kümogo. Onoki petrol aser diesel saru ajemang ta takhangba agütsür. Gari totzü ya GST kübok aittsüla," ta metetdaksü.

Brihostibarnü Venugopal-i sangdong ka ajanga,

Hokolbarnü party local units-i longkak aittsü saka ketdangsertemi tuyuba ama Covid-19 protocols shidak benshitsü, ta metetdakja liasü.

Congress party-isa twitter ajanga nüburtem dang BJP sorkari totzü jenjang kanga atuba anema June 11 nü longkak aitba nung shilem agidaksüner, ta ayongzüka liasü.

Congress party-i, "Wara mapang nunga BJP-i auyar. 2021 küm kija nunga totzü jenjang 47 ben tashi tuogo," ta metetdaksü.

Longkak aitba temaitsü Indian Youth Congress züngsemtemi courier ajanga Ato kilonser, Narendra Modi aser Union home minister, Amit Shah na dangi cycle yok.

Congress youth president, Srinivas BV-i, "Osettsüset nung jenjang maneni atu tenzükogo. Totzü jenjang tangsa ajemtsüla aser nüburtem nem relief

agütsüsüla ta onoki akhanger," ta ashi.

Tamil Nadu nunga AICC züngsem, Dr Aslam J Basha leniba nung Congress züngsemtemi, "Congress party-i mapang ajak nung India sensotem den külemi nokdaker, aser BJP sorkari nüburtem anema inyakba kodanga memelatsü," ta ashi.

Uttar Pradesh nungbo Congress-i longkak aitba mapang police-i Uttar Pradesh Congress committee Tir, Ajay Kumar Lallu densema Congress nung inyakertem aika apu.

Congress national convenor, Saral Patel-i, "Petrol aser diesel jenjang atuba anema longkak aitba nokdangtsü atema Uttar Pradesh nungbo tesem ajaklen lenirtem apur aser kidang nungi mayazükdaksür. Yogi Adityanath, kechiba yamai tsübur?" ta asüngdang.

### PMK-i MK Stalin dang Rajiv Gandhi tepsetertem chioktsü mepishi

**Chennai, June 11 (Agencies):** Pattali Makkal Katchi (PMK) tentetsang aser Tir, S. Ramadoss-i Tamil Nadu Chief Minister, MK Stalin dang dang Rajiv Gandhi tepsetba ken o nung aija alirtem chioktsü atema mepishi, ta metetdaksü.

Tamalen Palaniswami-i aniba sorkari inyakba ama tang aliba state sorkaria Angh dang Rajiv Gandhi tepsetba ken o nung aija alirtem chiokang ta mepishitsüla, ta Ramadoss-i ashi.

June 11 nü Ramadoss-i shidi ka ajanga Chief Minister, MK Stalin dang, state sorkari Rashtrapati Bhavan dang masü saka Raj Bhavan dang Rajiv Gandhi tepsetba ken o nung aija alir nisung tenet chiokang ta mepishitsüla, ta metetdaksü.

PMK leniri ashiba agi, Rajiv Gandhi tepsetba ken o nung aija nisung tenet apuba sülen June 11 nü küm 30 jungogo, ajüsüa aija alirtem chioktsü onük nung Raj Bhavan-i atsükshishir.


May ita nung Chief Minister MK Stalin-i shidi ka ajanga

linük Tir dang iba ken o nung aija alir nisung tenet chioktsü atema nai tiyongtsüi ia inyakdaksüner ta mepishia liasü, aser iba dak sendakba Ramadoss-i, Tir dang mepishiba agi parnok chioktsü maparen tasakba akümtsü, ta ashi.

"Iba telemtetba agitsü atema Angh dak tashi lir, ta court balalai jangja-jangja shiogo, anungji Tir dang mepishiba agi tebilemba mataloktsü," ta pai ashi.

Rajiv Gandhi tepsetba ken o nung aija alir nisung tenetji-Nalini Sriharan, Murugan, AG Perarivalan, Santhan, Jayakumar, Robert Payas aser P Ravichandran nung lir. Tang parnok Tamil Nadu nung aliba tepuokdak balala nung lir.

Taoba mapang India Ato kilonser, Rajiv Gandhi ya 1991 küm May 21 nü Tamil Nadu nung Chennai kübok Sriperumbudur nung election sentong ka nung adenba mapang nung bomb agi pokseta südaksü. Iba lendong nungji Gandhi densema nisung 14 pokseta liasü.



June 11, 2021 nü TMC Bhavan, Kolkata nung BJP lenir, Mukul Roy-i BJP toktsür TMC party nung adenba sülen TMC National General Secretary, Abhisekh Banerjee-i pa nem tenüngsang agütsüdang tangokba noksa nung angur. Kasa noksa nung West Bengal Chief Minister, Mamata Banerjee-a angur.

### India nung nisung 91,702 dak Covid putet aser nisung 3,403 asü

**New Delhi, Aami/June 11 (Agencies):** Tesüiba ghonda 24 tsüngda 24 tsüngda India nung ano nisung 91,702 dak coronavirus putet aser tang tashi nungbo linük nung nisung ajak agi 29,274,823 dak iba tashidak putetogo, ta Hokolbarnü Union health ministry-i metetdaksü.

Tanü (June 11, 2021) agi anogo pezünübuba linük nung anogo shia coronavirus case lakh 1 den tajemba puteter.

Tesüiba ghonda 24 tsüngda linük nung coronavirus tashidak agi nisung 3,403 süogo aser linük nung iba tashidak agi asür ajak agibo 3,63,079 jungogo.

Tang linük nung coronavirus agi teshirangdakpur 1,121,671 dang kümogo aser iba tashidak agi shiranger shilem 94.93 (nisung 27,790,073) anepogo.

Hopta shia coronavirus positive putetba shilem 5.14 aser anogo shia positive putetba

shilem 4.49 dang kümogo, ta Health Ministry-i metetdaksü.

Hokolbarnep ICMR-i, tang tashi nung linük nung samples ajak agi crore 37.42 tendangogo aser iba nungji Brihostibarnü samples 20,44,131 tendangba densema lir, ta metetdaksü.

Taküm January 16, 2021 nü India nung coronavirus vaccination drive tenzükba sülen tang tashi nung coronavirus vaccine dose ajak agi crore 24.60 agütsüogo.



Amritsar (Punjab), June 11, 2021: India nung gari totzü jenjang maneni atuba anema Hokolbarnü Amritsar nung Congress nung inyakertemi longkak aitagari ka rongdoktsüba noksa nung angur.

### SC-i Bengal nung 'One nation one ration card' scheme benoktsü tuyu

**Kolkata, Aami/June 11, 2021 (Agencies):** Hokolbarnü Supreme Court-i West Bengal Chief Minister, Mamata Banerjee dang state nung tangsa "One nation-one ration card" scheme benoka inyaktsü tuyuogo.

Supreme Court-i lockdown mapang tangalen oa aayangertem timtemba ken o aser sorkar schemes kübok tajangzük angutsü atema unorganised sector nung inyakertem registration agiba dak sendakba ken o angadanga liasü.

Supreme Court-i, "Nenoki timtem balala ashitsü makok. Iba ya tangalen oa aayangertem atema lir," ta metetdaksü.

Supreme Court-isa West Bengal nung "One nation-one ration card" scheme kübok nüburtem tajangzük angutsü atema tangsa iba scheme

benoka inyakang, ta tuyu.

"One nation-one ration card" scheme kübok Public Distribution System (PDS) ajanga tajangzük angurtemi states aser Union territory mashie ka nung fair-price shop nungi ration agitetsü.

Ajüsüa state aika nung "one nation-one ration card" scheme dak sendakba mangatettep adoka lir. Assam, Chhattisgarh, Odisha, Tamil Nadu aser West Bengal densema state aikati iba scheme ashishir.

Tamalen West Bengal Chief Minister, Mamata Banerjee-i, tangalen aayangertem aser unorganized sectors nung mapa inyakertem ket nung ration card maliyonga 2021 küm May ita tashi parnok nem jang aser menjang densema chiyungtsü balala subsidized jenjang nung agütsüsü, ta metetdakja liasü.

## SW Pakistan nung bus ka mükepök, nisung 18 asü

**Khuzdar, Aami/June 11 (Agencies):** Pakistan southwest tsütsü Balochistan province nung temeshi ainlen jajar ania aliba bus ka kanga kera orr mükepökba lendong nung nisung 18 asü aser 42 yiru, ta ketdangsürtemi ashi.

Iba lendong ya provincial capital, Quetta nung south tsütsü kilometer 260 shi pilar Khuzdar jila anasa Hokulbarnep atalok, ta security ketdangsür Bilal Ahmed-i ashi.

"Khuzdar jila anasa gari kanga kera aniba mechi driver-i mazüoktet aser bus ya lenmang tezülen mükepök," ta pai osangbener dang ashi.

Iba lendong nung kanga sashia yirurtem ya Pakistan nung yimti tulutiba, Karachi-i bener ogo, ta Ahmed-i ashi. Lendong atalokba tesem aser Karachi tsüingta kilometer 350 shi lir.

Bus nung temeshi ainlen jajarntem Balochistan kübok Wadh area nung tamangba yimsü dak sendakba sentong ka nung dener Sindh province-i meyip aoba mapang lendong ya atalok.

Pakistan nung iba ama lendong ya mapang shia ataloker,

## Philippine military tekolakbai mangatettep adoker aliba

**Manila, Aami/June 11 (Agencies):** Philippine armed forces tekolakbai South China Sea nung par linüki atsünger aliba asetkong ka iba hopta semdangogo. Pai asetkong semdangba ajanga Manila aser Beijing na tsüingda mangatettep adoker aliba tamajungba kümshitsü akok, kechiyong linük anapronglai iba asetkong ya parnok meiyong ta ashir.

Hombarnü asetkong semdangba mapang Armed Forces of the Philippines (AFP) tekolakba Cirilito Sobejana-i, asetkong nung aliba nüburttem kümzüka toktsüba aser linük litsü kanga junga nüka ataba atema sepaitem nem tenüngsang agütsü.

Asetkong temeket nung China nungter telungpurtem (militia) indang rong aika Philippines indang economic zone-i aitba

talisa junga aneplau masüba yimtsüing lenmangtem aser tesem tezülen aliba district tem den sendaktepba highway nung ataloker.

2018 World Health Organization osang ajanga ashiba agi, 2016 küm lenmang nung lendong atalokdak nisung tajemba agi 27,582 süogo, koba nütsüing yongsük 100,000 nung shilem 14.3 lir.

2016 küm sülen China-Pakistan Economic Corridor (CPEC) ajanga tesem kar nung senotsü indoka lenmang yanglushia arudar. China-Pakistan Economic Corridor (CPEC) ya linük ana tsüingta sen billion \$60 jenjang transportation, shishilempaba aser ki-o-jen yanglutsü atema tezüingzüktep yangluba lir.

Ajisüaka küm aika Pakistan nung lenmang kar aser railway transportation system ajunga nung terenlok mali.

Hombarnü Sindh province nung passenger train ana tsüktepa iba lendong nung nisung 63 asü aser 100 dak tema yirua liasü.

## tekolakbai mangasetkong semdang

sülen Philippines-i ken o ashishia liasü.

Ajisüaka China-i, rongtem ya tzüyim nung tzüsem tesashi adokba ajanga khen atema jenokba dang aser telungpurtem rong nung mena maliasü ta ashi.

Sobejana-i, Thitu asetkong, koba Philippines nungertemi Pagasa ta ajar, iba asetkong ya Hombarnü semdang saka Bodhbarnüang osang agütsü.

Spratly archipelago nung Philippines-i atsünger aliba asetkongtem rongnung Thitu asetkong ya tulutiba lir aser iba asetkong nung nisungtem aser sepaitem ishika lir.

Philippines, Brunei, China, Malaysia, Taiwan aser Vietnam linüktem South China Sea dak sendakba nung mangatettep adoker lir, kong küm shia khu USD trillion 3 dak tema belenshir.

## G7 ajangamakamaiter linük nem COVID-19 mozü agütsütsüla



Guatemala City nung aliba Universidad del Valle de Guatemala nung kin balala lenirtem den senden amentsü atema US Vice President Kamala Harris aru ataba mapang Nobel Peace Prize angur Rigoberta Menchu-i (achichi) Aura Leticia Teleguario Sincal tsütsü tejak meyip aolidang tangokba noksa ka yangi angur. Rigoberta Menchu aser Aura Leticia Teleguario Sincal na ya Indigenous Women Platform nungi lir.

**London, Aami/June 11 (Agencies):** Küm ana jungnüa nung tang mezüingbuba G7 lenirtem ajuruteper aser alima nung tesensaktiba linüktem nem COVID mozü doses billion ka tenla agütsütsü nangzüksü imlar.

Rongsenketsüing tsütsü temaba jenjang nung aliba linüktem - Canada, France, Germany, Italy, Japan, United Kingdom aser United States - yagi alima nung health tsütsü timtem aser tzü mopung melenba azüoktsü atema lungjemer menokdakra iba dang nungi tajungba maongka mangutsü ta ashir.

Saka Hokulbarnü tenzüka senden nung iba mozü atema inyakteper temi ashiba agi, US nungi doses million 500 aser UK nungi doses million 100 yagi meperitsü.

"Tajungtiba G7 lenirtemi mozü doses billion ka tenla

agütsütetra, iba senden ya tamakok alitsü," ta Oxfam indang health policy manager Anna Marriott-i ashi aser alima nung COVID-19 mozü ya doses billion 11 nüngdaker, ta lai ashi.

"Teyari agütsüba kisüing agi mozü anüingba mayimjemsü. G7 ajanga pharmaceutical monopolies raksatsüla aser alima nung mozü yanglutsü temsüa aliba company tem den mozü yangluba yimya lemsateptsüla," ta lai ashi.

"Tir Biden aser Macron nati COVID mozü yangluba nung 'intellectual property' nung saru adoktsü busema nokdaka lir, anungji G7 nung danga linüktemia yamaji inyaksüla. Tang terenlokba aliba linüktem nung nisung million aika takum ya takar linüktem aser tajangzük bushiba pharmaceutical corporations nung kodanga metaloka malitsüla."

London nung amenoka aliba

science and health charitable foundation, Wellcome nung director of government relations, Alex Harris-i ashiba agi, "US aser UK nati inyakba ya tesem shidakleni aoba mera ka lir, saka parnoki talangka motettsü, kera motettsü."

"Alimai tang mozü nüngdaker, küm tatemlen masü. Tang otsüsütsü mapang G7 ajanga yimten yimsüsür sempet sayutsüla... G7 lenirtem dang parok nükla tuluba akumtsü ajungshir," ta pai ashi.

G7 senden amentsü lia France Tir Emmanuel Macron aser pa kinungtsü Brigitte Macron na Newquay, England nung aliba Cornwall Airport tonga aruba mapang tangokba noksa ka yangi angur. G7 lenirtem Carbis Bay nung asemnü senden tenzüko, kong COVID-19, climate, foreign policy aser rongsenketsüing indang jembitsü.

## 2020 tezüingzüktep kübok Turkey sepaitem ainshitsüla: Taliban

**Kabul, Aami/June 11 (Agencies):** Bendanger sepaitem anizüker aotsü atema 2020 küm tezüingzüktep agiba kübok Turkey sepaitem Afghanistan yutsür aotsüla, ta Taliban odongtar kati ashi, anungji United States-i aniba NATO sepaitem linük yutsür aoba sülen Ankara-i Kabul indang airport anüktsü aser ketdangsütsü sentong aliba magizüker.

Iba yongji Kabul nung mission amenoka aliba US, danga linük aser international organisation temi par sepaitem linük balala agi müketbanger aliba Afghanistan nungi tajungtiba nung anizüker aotsü atema khuret abener.

Turkey-i Russian defence system alizükba ajanga Ankara aser Washington tesendaktep mejungi kumdahtsür aliba mapang Hombarnü Tir Joe Biden aser Turkey Tir Recep

Tayyip Erdogan na ajuruteptsü lia tesendaktep ajungtsü teimla nung Ankara-i arrsanga Kabul airport ya kangzüksü meranga liasü.

Bendanger sepaitem linük yutsür aoba sülen international airport anüktsü aser ketdangsütsü atema Turkey-i par sepaitem Kabul nung yutsütsü benokba onük ya Taliban-i magizük asü, ta text message ajanga asüingdangba mapang, parnoka aotsüla, ta Taliban odongtari Doha nungi langzü.

"Tesüiba küm 20 tsüingta Turkey ya NATO forces nung shilem ka liasü, anungji US den February 29, 2020 nü tezüingzüktep agiba nung ajemdaker parnok Afghanistan yutsür aotsüla," ta Suhail Shaheen-i ashi.

"Mesüra Turkey ya Islamic linük tajung ka lir. Afghanistan ya iba linük den tesendaktep aliba otsü lir. Tarutsü nung

Islamic sorkari tasen amenokba mapang parnok den tesendaktep tajung alitsü onok teimla lir," ta pai ashi.

Iba dak sendakba nung State Department aser Turkish foreign ministry ajanga telangzüba agüja mali.

US Defense Secretary Lloyd Austin-i linük ana tsüingta tesendaktep aser region nung ken o balala atema Turkish Defence Minister Hulusi Akar den Brestostibarnü jembio, ta Pentagon-i sangdong ka nung ashi, saka yangji Afghanistan indang meshisem.

February 2020 nung Taliban aser US tsüingta tezüingzüktep yangluba nung US sepaia ajunga Afghanistan nungi May 1 tashinung anizüker aotsü renem, kong taoba Tir Donald Trump indang administration ajanga meiyongnem agüja lir.

Saka September 11, 2001

nü US nung lendong agütsür küm 20 ajungba anogo tashinung ang sepaitem ya ajunga anizüker omatsü, ta Biden-i ashi. September 11, 2001 nü US nung lendong agütsüba ajanga US-i anir Afghanistan amak aser Taliban sorkar atsüingdok, shirnoki al-Qaeda telok atsükokdakja liasü.

Taliban anema raraba nung Afghan sorkar küm 20 busema aruba sülen US aser par den külemi rarartemi September 11 tashinung sepaitem anizüker aotsü atema May ita NATO senden amendang lemtet aser iba mapang Kabul airport onük ya benoka liasü, ta Turkey ketdangsürtemi ashi.

Azüdokshi tali akumba ajanga bendanger sepaitem anizüker aoba aser yimjung ken o jembiba anendaka aliba mechi Afghanistan ya civil war tsütsüi nunger aor aser

Taliban ya meyip a shilangtsü akok ta US legislator aser tang aser taoba mapang ketdangsür inyaker temi tsübua bilemer.

US sepaitem anizüker aoba maparen shilem 50 dak tema renemogo, ta Pentagon-i ashir. Turkey sepaia 500 dak tema Afghanistan nung security forces nem training agütsür, aser tang bendanger sepaia timtiba alibaji parnok ya alitsü.

Security mechi Australia-i taoba ita Afghanistan nung aliba embassy shibangogo. Turkey-i airport agitsü sentong aliba Taliban-i magizükba ajanga danga linüktemi par mission shibangtsü akok.

Aser iba yongji Biden administration tekolok atsüksüsa akumer, kechiaser hopta tetenzüklen Secretary of State Antony Blinken-i Congressional hearing alidang Kabul nung US sentsü lidaktsütsü nangzük.





Dimapur, Aami/June 11, 2021: Health worker kati tanur ka dak PCV vaccine agütsüba mapang tangokba noksa ka yangi angur. State nung tanünga District den jangyu medema, Hokolbarnü (11.06.2021) Zunheboto kübok Khuwaboto SC nung Pneumococcal Conjugate Vaccine (PCV) mapatong tenzükja liasü. Dr. K. Akaho Sema, Dy. CMO, Zunheboto-i okila jembi aser pai iba PCV vaccine agütsüba sentong tenzüksü.

### Rajkumar aser Karan longjemer vaccination drive ayongzüksü

**Mumbai, Aami/June 11, 2021 (Agencies):** India nung COVID-19 tensa ajanga nüburtem timtema aliba mapang ka nung, entertainment industry nung inyakertem atema taa magi vaccination drive ka tenzüksütsü nükjidong nung, film yanglur Rajkumar Hirani, Karan Johar aser producer Mahaveer Jain nung longjemogo.

Film tentet telungtet nung temelenshi tajung adokdaksütsü asoshi, mapang shia linük tesem ajunga nung film tentet temi maparen balala inyaka arudar.

"Change Within mapatong kübok Art of Living and Zerodha den teka amteper onok indang free Vaccination drive nung Media & entertainment industry indang front line worker nem vaccine agütsütsü maongka anguba atema pelar. Cowin protocol ajak nung anidaksü asoshi onoki Apollo Hospitals den longjemer inyaktsü," ta Nikhil Kamath, Co-founder Zerodha & Producer Mahaveer Jain nati ashi.

Iba campaign nung nüngtugu actor aser film yanglur talisa Sanjay Dutt, Kapil Sharma,

Bhumi Pednekar, Aanand L Rai, Dinesh Vijan aser Sonakshi Sinha nungeri shilem tuluka agiogo.

Tesüiba anogo ishika tejakdang, film industry nung inyakertem atema Yash Raj Films (YRF) studios ajanga COVID vaccination drive mapatong tenzüksütsüba osang ajanga angazükogo. YRF-i iba drive mezünga shilem nung industry nung mapa inyaker 4000 tashi ayimjema vaccine agütsütsü nükjidong lir.

Aditya Chopra indang production house yagi FWICE (Federation of Western India Cine Employees) nung register süa alir züngsem 30,000 nem vaccine agütsütsü sentong lir. Mumbai kübok agiba drive sentong ka nung, company-i

mapa inyakertem nem vaccine agütsüogo.

Aditya Chopra dak alia, producer Sajid Nadiadwala-ia company nung inyaker 500 dak tema aser par kibongtem atema vaccination drive ka ayongzükja liasü. Taoba hopta, Producers Guild of India (PGI)-i member aser associated production crew ajak atema vaccination drive tenzüksütsü.

Maneni, vaccination drive tsüngsü nung ajemoka, Indian Motion Picture Producers' Association (IMPPA) aser Screenwriters Association (SWA) nati parnok indang staff member tem atema angati vaccination drive sentong tenzüksütsü osang sangoktsüogo.

### Dimapur Police-i nisung ana apu

**Dimapur, Aami/June 11, 2021 (TYO):** Brehostibarnü (10.06.2021) Westyard tesem nung Dimapur Police-i nisung ana puogo, ta Addl. Dy. Commissioner of Police (Crime) & PRO, Dimapur sangdong ka ajanga metetdaksü.

Pua alir ana ya Toluka Chophy

(30) aser Anovi Awomi (37) na ta jangjaogo. Tenati TVS Apache bike ka auyar jena aotsü merangba mapang, iba colony nung alirtemi lazüka police dang metetdaksü.

Tena anema Sub-Urban PS, Dimapur nung ken o ka benokogo, ta kasa sangdong nung shia lir.

### Unit Family Welfare-i vaccination drive ayongzük

**Dimapur, Aami/June 11,** ajanga iba drive achaayanga 2021 (TYO): Hokolbarnü, agiogo.


Police Reserve, Supply Iba sentong nung, CP Colony, Dimapur nung Unit Dimapur-i Medical Family Welfare-i Rothihu Department dang pelaba Tetseo, IPS, Commissioner of Police, Dimapur matsündang COVID-19 vaccination drive sentong ka ayongzük, ta Addl. Dy. Commissioner of Police (Crime) & PRO, Dimapur sangdong ka ajanga metetdaksü.

CP Dimapur-isa, vaccine agütsü ya pei pei tangatetba/mulungtetba dak tuluka keta lir, ajisüaka COVID-19

MO aser In-charge vaccine anema tiyazü/olulu UPHC Duncan Basti, osang prokba maparen ya Dimapur, Dr. Rose-i anir ozünga alema inyakba ama lir, District Medical team teyari ta telok dang ashi.



Peren, Aami/June 11, 2021: Deputy Commissioner Office, Peren indang staff den DC Office Complex telungtet nung alir Department tem longjemer Hokolbarnü (11.06.2021) iba Complex telung aser temeküt nung nübodok mapa inyaka liasü. Iba nübodok mapa ya District Administration-i achaayanga liasü, kong, tzü aolen, tzü atsüngdena aliba tesem merüka aser ayi agi meyibanger aliba tesemtem merükba densema tanga mapa balala inyakogo, ta sangdong ka ajanga metetdaksü.



### PELABA LEMSATEPER

Sangtemla Ward nung ozü senso tajung ka June 9, 2021 nü tia makai asüba mapang District Administration, CMO, MTBA aser SDRF ajanga mapang shidak nung teyari agütsüba asoshi Sangtemla Ward yimten ajanga pelaba lemsateper.

**Chairman**  
Sangtemla ward  
Mokokchung

**Secretary**  
Sangtemla ward  
Mokokchung

## Mokokchung District Tack Force COVID-19 Vaccine VACCINATION SCHEDULE & UPDATES

### 18 - 44 YEARS

Slots open for online booking from 9 AM Sunday (13<sup>th</sup> June 2021) at DH Mokokchung and UPHC Yimyu, Mangkolemba CHC and Changtongya CHC for those between 18 and 44 years. You can go to [selfregistration.cowin.gov.in](http://selfregistration.cowin.gov.in) and register plus book slot. Or download the COWIN App / Aarogya Setu App for the same. 18-44 years Online Booking for DH Mkg, UPHC Yimyu, CHC Mangkolemba & CHC Changtongya. Rest will be ON THE SPOT REGISTRATION.

#### MONDAY - 14<sup>th</sup> JUNE 2021 (18-44 years)

1. District Hospital Mokokchung - 300 Slots
2. UPHC Yimyu - 200 slots
3. Longchem PHC - 100 Slots
4. Tsurangkong PHC - 100 Slots
5. Kangtsung PHC - 100 Slots
6. Alongkima PHC - 100 Slots

#### TUESDAY - 15<sup>th</sup> JUNE 2021 (18-44 years)

1. District Hospital Mokokchung - 300 Slots
2. UPHC Yimyu - 200 slots
3. Changtongya CHC - 150 Slots
4. Mangkolemba CHC - 150 Slots
5. Sabangya PHC - 150 Slots
6. Mangmetong PHC - 100 Slots
7. Longsa PHC - 150 Slots
8. Longjang PHC - 100 slots

#### WEDNESDAY - 16<sup>th</sup> JUNE 2021 (18-44 years)

1. Ungma PHC - 200 Slots
2. Mongsenyimti PHC - 150 Slots
3. Chuchuyimlang PHC - 150 Slots
4. Merangkong PHC - 100 Slots
5. Longkhum PHC - 150 Slots
6. Lakhuni PHC - 100 Slots

#### THURSDAY- 17<sup>th</sup> JUNE 2021

(18-44 years, 45+, HCWs, FLWs)

1. Sungratsu HWC - 150 slots
2. Mopungchuket HWC - 150 slots
3. Longmisa HWC - 150 slots
4. Pangsang HWC - 100 slots
5. Longkong HWC - 100 slots
6. Changki HWC - 100 slots
7. Khar SC - 100 slots
8. Mongchen SC - 100 slots
9. Mekuli SC - 100 slots
10. Chungliyimsen SC - 100 slots

#### THURSDAY- 17<sup>th</sup> JUNE 2021

(45+, HCWs, FLWs for both 1<sup>st</sup> & 2<sup>nd</sup> dose)

1. District Hospital Mkg.
2. UPHC, Yimyu
3. Mangkolemba CHC
4. Changtongya CHC
5. Longchem PHC
6. Tsurangkong PHC
7. Lakhuni PHC
8. Kangtsung PHC
9. Alongkima PHC

#### FRIDAY- 18<sup>th</sup> JUNE 2021

(18-44 years, 45+, HCWs, FLWs)

1. Aliba SC - 100 slots
2. Kupza SC - 100 slots
3. Yajang SC - 100 slots
4. Tzudikong SC - 100 slots
5. Japu HCW - 100 slots
6. Moayimti SC - 100 slots
7. Nokpu HCW - 100 slots
8. Medemyim SC - 100 slots
9. Chakpa SC - 100 slots
10. Kinunger SC - 100 slots

#### FRIDAY- 18<sup>th</sup> JUNE 2021 (45+, HCWs, FLWs)

1. Sabangya PHC
2. Mangmetong PHC
3. Longsa PHC
4. Chuchuyimlang PHC
5. Longkhum PHC
6. Ungma PHC
7. Longjang PHC
8. Mongsenyimti PHC
9. Merangkong PHC
10. Changtongya Village HWC



## Sri Lanka tour atema Shikhar Dhawan captain shimogo



**New Delhi, Aami/June 11, 2021 (Agencies):** Taruba ita Sri Lanka team den limited-overs tour atema, Brehostibarnü, opener Shikhar Dhawan India team indang captain ama shimogo. Kasa mapang, iba tour atema BCCI-i 'uncapped player' trok aser asayar tasen densema züngsem 20 squad sangdongogo.

World Test Championship final aser England series atema linük indang cricket asayar tajung ajak England nung lir aser Sri Lanka tour atema shima alir asayar tasentem yagi team atema tenüng tajung bener arutsü teimla tulu lir.

Item asayar tasen yagi taoba

ita thitemba Indian Premier League nung junga shilem agiogo aser ibaji ajanga Sri Lanka tour nung shilem agitsü parnoki maongka tajung angur alitsü. Parnok rongnung Devdutt Padikkal, pacer Chetan Sakaria, Nitish Rana, Krishnappa Gowtham, Raturaj Gaikwad aser Varun Chakravarthy nung dena lir.

Prithvi Shaw aser Manish Pandey na iba squad nung denogo, saka Shreyas Iyer selection nung maden. Shreyas tapubang yirur aliba nungi junga taneptsü mengutetba ajanga squad nung pa maniok.

Wicket-keeper batsmen ana Ishan Kishan aser Sanju Samson

dak alaka, iba squad nung spinner Kuldeep Yadav aser Yuzvendra Chahal na den adianu - Hardik aser Krunal Pandya dena lir.

Iba tour nung, India-i Sri Lanka den One-day International asem aser Twenty20 asayatsü terenemba lir. July 13, 2021 nungi tenzüka iba tour asayatsü aser July 25, 2021 nü tembangtsü.

ODIs aser Twenty20 asaya ajak Colombo kübok R Premadasa International Cricket Stadium nung ayongzüksü.

Sri Lanka Tour atema India indang squad nung Shikhar Dhawan (Captain), Prithvi Shaw, Devdutt Padikkal, Raturaj Gaikwad, Suryakumar Yadav, Manish Pandey, Hardik Pandya, Nitish Rana, Ishan Kishan (Wicket-keeper), Sanju Samson (Wicket-keeper), Yuzvendra Chahal, Rahul Chahar, K Gowtham, Krunal Pandya, Kuldeep Yadav, Varun Chakravarthy, Bhuvneshwar Kumar (Vice-captain), Deepak Chahar, Navdeep Saini aser Chetan Sakariya dena lir.

Kasa tour atema 'Net Bowler' temji Ishan Porel, Sandeep Warrier, Arshdeep Singh, Sai Kishore aser Simarjeet Singh alitsü.

## Cidade de Lisboa nung Neeraj Chopra-i gold medal angu

**Lisbon, Aami/June 11, 2021 (Agencies):** Meeting Cidade de Lisboa asayamung javelin tetoktepba nung, India nung Neeraj Chopra-i gold medal takok angu. Brehostibarnü, javelin tetoktepba nung Neeraj-i trokben aser tatem buba nung metre 83.18 tashi yokteta iba jenjang ajangzüket.

Portugal nungi asayar pungo den arishi küm 23 tain Chopra-i toktepa liasü, kong pai javelin yokba rongnung tajungtiba ji metre 83.18 shi asadanteta parnok madak takok angu. Tanüngba asayartem yagi metre 80 dak tema meyoctet.

Portugal nungi Leandro Ramos-i metre 72.46 tashi yoka pai tanabuba jenjang ngutet.

Külem asayar Francisco Fernandes-i metre 57.25 tashi yokteta tasembuba jenjang angu.

Iba asaya tenzüker, Chopra-i mezüng merangdangba mapang, pai metre 80.71 yoktet, saka pai tanaben aser tasemben yokba magizük. Pezübenbuba nunga pai junga meyocteti metre 78.50 dang tongtet. Iba sülen pai pungoben merangdangba magizük aser trokbenbuba nung metre 83.18 shi tongteta liasü.

Taküm March ita Patiala nung, Chopra-i metre 88.07 tashi yoka iba season nung record yanglua lir. Tarutsü nung ano toktepa asayamung tulu nung tajungtiba asayatsü asoshi Neeraj-i tali meranga inyaksü

nüngdaker.

Ita 18 sülen, Lisbon asayamung nung Neeraj Chopra-i bendanglen mezüng shilem agir alitsü.

Tokyo Olympic atema lateta aliba 'qualification standard' - metre 85 tongtettsü atema, 2020 küm January ita Neeraj-i Potchefstroom kübok South African domestic meet nung shilem agia liasü. Iba mapang pai metre 87.86 tashi yokteta lir. Iba sülen, Covid-19 wara tenokdangba ajanga, pai international level nung mapang talangka shilem magii aru.

Neeraj France-i aotsü atema, taoba hopta pa visa nguogo aser iba sülen asayamung ka atema Portugal-i ao.

## 'The Hundred' nungi Warner aser Stoinis na tukuogo

**New Delhi, Aami/June 11, 2021 (Agencies):** Australia nung David Warner, Marcus Stoinis aser New Zealand tetsür Cricket team nungi star Sophie Devine nung 'The Hundred' asayamung nungi tukadokogo. International schedule nung adentsü sentong renemba den Covid-19 wara dak sendakba nung senzusenbongtsü timtem adokba ajanga parnoki iba asayamung nung shilem magitettsüsa akümer.

"David aser Marcus na iba asayamung nungi tukadokba osang ya tejashitsüka lir, saka Covid tenokdangba ajanga bendanglen nungi asayartem senzusenbongtsü asoshi tetsükdaktsü adoker. Southern Brave ajanga item asayar melena tanga anioktsü sentong yanglutsü aser taküm tsüklawa

mongpu mapang, Hundred' asayamung nung onoki world-class cricket sayutsü renema lir," ta ESPNcricinfo dang England and Wales Cricket Board (ECB)-i ashi.

Southern Brave ajanga contract nung Warner aser Stoinis naprongla anioka liasü. Kasa mapang Birmingham Phoenix nungi Devine asayatsü renemer liasü. West Indies aser Bangladesh white ball tour atema Warner aser Stoinis naprongla Australia indang squad nung dena lir, koba Hundred asayamung asayaba mapang ka nung July 21 nungi August 21, 2021 tashi tour anaprongla konghshir.

Australia selector Trevor Hohns-i ashiba agi, mezüng squad nung anioka alir asayartem tukadoktsüsa kümra,

parnok melenzüksü asoshi preliminary squad nung asayar talila trok tashi bendenlok.

"Asayar, staff aser ketdangsur tem iba wara nungi kümzüka yutsütsü asoshi CA-i bilemetsür aser ajak dang ibaji tongtibangtiba lir," ta pai ashi.

The Hundred asayamung atema, Southern Brave-i Warner aser Stoinis na contract nung pound 100,000 (\$141,680.00) aser pound 80,000 yong alizüka lir. Iba asayamung taruba ita nungi asayatsü sentong lir.

Iba saisapong nung terepranger tasen aika atsüa arutsü nükkidong nung, ECB-i The Hundred atema sen jenti indokogo. Iba asayamung innings shia nung ball 100 tashi asayatsü, kong bowler shia ball 10 aontsü.

## Poland Open: Vinesh Phogat final-i iogo

**Warsaw, Aami/June 11, 2021 (Agencies):** Tokyo Olympics atema renemshiba shilem ka ama, India tsür wrestler Vinesh Phogat-i tang asaya Poland Open nung takok ngua 53kg final tongtetogo.

Iba asaya nung Vinesh point 6-2 agi tejakdang makümdang, la indang mezüng bout nung, 2019 World bronze medal takok angur Ekaterina Poleshchuk den meranga toktepa asaya. Final tongtettsü atema, Vinesh-i second 75 nung America tsür Amy Ann Fearnside tsükdaktsü.

Vinesh-i Ukraine tsür Khrystyna Bereza den final asayatsü.

Taküm March ita Matteo Pellicone aser April ita Asian Championship nung tite ana tashi anguba sülen, arishi küm 26 tain Vinesh-i tan season' asayamung nung gold medal tasembuba takok angutsü teimla lir.

2019 World bronze medal takok angur Ekaterina Poleshchuk indang defence kanga tajung asünung, mezüng bout nung Vinesh-i la den kanga meranga asayatsüsa aküm.

Iba tetoktepba nung, Vinesh-

i 'left-leg attack' tasa amshia Ekaterina amokbangtsü merangdang, saka Russia tsür Ekaterina-i la tsükdakja point 2-0 agi tejakdang aküm; aser Vinesh nem ajangtettsü maongka magütsü asaya liasü. Break atongtsü lia, Vinesh-i ano tasa ka amshia Ekaterina laodaktsütsü merang, saka la tebilemba matalok.

Tanabuba round tetenzüklen, Vinesh-i double leg attack" tasa amshia Ekaterina amokbanga tena tsüngda point kasa (2-2) aküm aser Ekaterina-i asaya dak mapet yimya benshia la nem tekümdangtsü agütsüba mapang, Vinesh-i ano point talila ana angu.

Vinesh 4-2 agi Ekaterina tejakdang ser asayaba mapang, lai point ka bendenloka iba asaya koktet.

Asaya tanga ka nung, Vinesh-i ayong ayonga dang America tsür Amy tsükdaktsü. Vinesh-i second 75 nung iba asaya koktet aser iba mapang la point 6-0 agi tejakdang liasü.

Kasa asayamung nung, Anshu Malik temang nung timtem aliba ajanga, 57kg category tetoktepba nung lai shilem magitet.

## COVID-19 Nagaland... (Tapak 1 nungi...)

"Külen, Nagaland nung COVID-19 alitsü akok ta temolung melemi bilemba sample 2,05,449 tendangogo. RT-PCR ajanga 93,305, TrueNat ajanga 58,026 aser Rapid Antigen Test ajanga 54,118 tendang" ta Dr Kikon-isa ashi.

"Brihostibar tashi nung Nagaland nung nisung 2,71,656 nem COVID-19 vaccine indang dose 3,26,191 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 59,269, healthcare workers 15,683, arishi küm 45 ser temapur 1,27,557 aser arishi küm 18 nungi 44 tsüngda alir 69,147 lir, ta pai ashi.

"Vaccine agirtem rongnung nisung 54,535-i vaccine indang dose anaprong agiogo. Parnokji frontline workers 28,102, healthcare workers 10,291 aser arishi küm 45 ser temapur 16,142 lir" ta Dr Thurr-isa metetdaksü.

## Dimapur aser Kohima nung... (Tapak 1 nungi...)

Dimapur district nung COVID-19 vaccine agütsüba maparen nung IT tsütsü yariteptsü atema Common Service Centres lapoktsü melar.

Taxi, auto rickshaws dena Light Motor Vehicle tem odd-even inyakyim nung senzütsü melar. Ajisüaka, taxi, auto rickshaw driver temi negative COVID-19 text report angutsüla. Dimapur nung bus service, two wheeler taxi service maneni shibanger aser two wheeler nung nisung tesülen amentsü memelar.

Külem, Kohima Deputy Commissioner aser DTF Kohima Chairman-ia tanga sangdong ka nung tetuyuba agütsüogo.

Kohima nunga temalen agüja aliba inyakyimtem benshitsü shia aliba dak alia tsünglanglen agüja aliba inyakyimtem densemer. Anepdang 6:00 ako nungi

nikongdang 2:00 ako tashi ozüngi melaba dokan aser shishilembadak lapoktsü aser nisung ajaki Covid inyakyim benshitsü.

Highway anasa aonsotsü, shi/ango, mamatzü, shiruru chiyungtsütem ayokba dokantem den grocery store aser bakery anepdang 6 nungi nikongdang 2 tashi lapoktsü melar.

June 12, 14, 17 aser 18 anogotem Hardware & Electrical, stationeries, mobile phones aser computer accessories ayokba dokantem lapoktsü melar. Kasa anogotem automobile repairing garage aser spare parts ayokba dokantem lapoktsü.

Restaurant/eatery nung take-away/ food delivery dang melar saka Covid inyakyim akangkanga benshitsü.

## BILEMDANGANG

"Pei tashi den meputep tangar chilu ayidang takoksa angur."